

GIZA ESKUBIDEAK. Europari laguntza eskatu diote «herria ezabatu nahi duen basakeriari» aurre egiteko



JAGOBA MANTEROLA / GARA

Euskal Herriko eskubideen urraketa antzeztu dute Estrasburgon

SOS Euskal Herria taldeko ekintzaileek «Euskal Herriaren eskubide zibil eta politikoen kontra Espainiak eta Frantziak daramaten estrategia» antzeztu zuten herenegun Estrasburgon. *SOS Basque Country* leloa zuten buzoak eta kareta zuriak jantzirik, gorputzak zeharkatzen zituzten lantzak zeramatzen ekintzaileek, eta zintzilik Espainia eta Frantziako banderak zituzten. Lurrean, berriz, ikurrinak jarri zituzten. Parodia Estrasburgoko Notre Dame katedralaren aurreal-

dean egin zuten. Bertatik igarotzen ari ziren hiritarrek harrituta begiratu zieten ekintzaileei. Horiekin batera, hogeita hamarren bat lagunek protestaren zergatia azaltzen zuten orriak banatu zituzten. Dei egin zioten Europari «herri bat ezabatzea bilatzen duen basakeriari» aurre egiten lagundu dezan. SOS Euskal Herriaren lehen ekintza izan zen herenegungoa, eta Giza Eskubideen Nazioarteko Eguna baliatu zuten horretarako.

LABURREAN

Jaurlaritzak eta Trebiñok lankidetzaren hitzarmen bat sinatuko dute «aurki»

Eusko Jaurlaritzak lankidetzaren hitzarmen bat sinatuko du «aurki» Trebiñoko Konterriko bi udalekin, arlo politiko-administratiboa eta zerbitzu publikoena jorratzeko. Jaurlaritzaren ustez, akordioak ez du Gaztela eta Leon eta EAEko instituzioen arteko harremanetan esku hartzen. Gaztela eta Leongo Gobernua «isekatzat» jo du.

ETAko militanteen omenaldiak galarazteko eskatu du San Gilek

PPk Jose Luis Caso ETAK duela lau urte hildako Errenterriko zinegotzia omendu zuen atzo Irunen. Gipuzkoako PPko presidente Maria San Gilek adierazi zuenez, lau urteren buruan «ETAK hiltzen segitzen du». Horregatik, «formula irmoak» eskatu zituen, «ETAko militanteei egiten zaizkien omenaldiak galarazteko».



GARI GARAIALDE

Ertzaintzak udaletxearen aurrealdea sokaz inguratu zuen.

Bonba mehatxu faltsua Donostiako udaletxean

Donostiako udaletxean lanean ari ziren beharginak eta zinegotziak irtenarazi zituen atzo Ertzaintzak, bonba mehatxua jaso ondoren. Eguerdiko 12:30ean, SOS-Deiak zerbitzuari telefonoz egindako dei batek udaletxean lehergailu bat zegoela ohartarazi zuen. Bonbak 12:45ak baino lehen eztanda egingo zuela zioen ahots anonimoak. Ertzaintza bertaratu zen eta eraikina hustuarazi zuen. Ordubete geroago, barruan ez zegoela lehergailurik baieztatu zuen Ertzaintzak, eta bere zereginetara itzuli ziren zinegotzi eta langileak. Odon Elorza alkatea ez zegoen une horretan udaletxean, bilera bat zuelako, baina hura amaitu eta inguruetan zain egon zen.

Fiskalak 22 urteko espetxe zigorra eskatu du Carmen Gisasola euskal presoarentzat

Fiskalak 22 urteko espetxe zigorra eskatu zuen atzo Carmen Gisasola euskal presoarentzat, ustez 1986an Algortako Guardia Zibilarren kuartela granadaz erasotzeagatik. Auzitegi Nazionalen egindako epaiketan, fiskalak atentatuaren egileztatu jo zuen Gisasola, eta defentsak absoluzioa eskatu zuen. Frantziak estraditatu osteko lehen epaiketa du Gisasolak.

Corcuera ez zuela gainsoldatarik baimendu eta Vera ez zela aberastu diote euren abokatuak

Diru bereizien auziari buruzko epaiketan, atzo, Jose Luis Corcuera Espainiako Barne ministro ohiaren abokatuak esan zuen hark ez zuela «ez ezagutu, ez onartu eta ezta baimendu ere gainsoldatarik». Rafael Vera Segurtasunerako Estatu idazkari ohia ez zela «aberrastu» adierazi zuen, berriz, bere abokatuak.

ELKARRIZKETA

ETAko buruen «formakuntza politiko falta» nabarmendu du Madariagak

Erredakzioa | BAIONA

Julen Madariaga ETAko arduradun ohi eta Aralar-ko kideak Frantziako *Le Monde* egunkariari elkarrizketa eskaini zion atzo. Haren ustez, ETAko orai-ko buruzagitzako kideek «20 eta 25 urte bitartean dituzte eta ez daukate lehengo formakuntza ideologiko eta politikorik, ez eta pazientziarik ere». Madariagaren ustez, «lehenago gogorrak bezala aurkeztuak ziren batzuk, Mikel Antza bezala, uso itxura daukate orain».

Aralar-ko kidea «gehienik kezkatzen» duena da Batasuna eta Segiko gazteek «ez dutela distantziarik hartzen ETArekin». Azken hauteskundeetan Batasunak «aullien erdia galdu ondoan, hutsegite horren ikasgaia atera behar» zuela eta «ETA bortizkeriaren uztera bultzatu», uste du Madariagak. «Baina ez dira tuntitu, gehiago erradikalizatu dira, desesperagarria da».

Jendarmeekin gertatu azken tiroketak «Madril eta Parisen arteko kooperazio judizial eta polizialarekin» lotu zituen. Tiroketa horiek Lionel Jospin lehen ministroari zuzendu mezuek ere izan daitezkeela ez zuen baztertu. «Frantzia Korsikaz arduratzen da, baina, euskal arazoaren konponbideari dagokionez, dena Espainiarren esku utzia da», mezua litzateke, bere ustez. Estrategia aldaketa bat ba ote dagoen galde-tzean, «zuhur egon» behar dela erantzun zuen. Hala izatekotan, «Espainian eta Frantzian bietan batera fronte bat irekitzea suizidio bat litzateke militarki, baita politikoki ere», adierazi zuen.

Segurtasun neurriak

Bestalde, Pirinio Atlantikoetan diharduten polizia eta jendarmeei segurtasun neurriak handitu dizkiete. *Le Monde*-k kaleratu zuenez, gauetako patruilak hiru poliziaz osatuta daude —lehen bi ziren—, horietako bat fusil batekin armaturik, eta errepedeetako kontroletan bost pertsona jarri dituzte.